

**Ubutumwa BIKIRA MARIYA yahaye Valentine Nyiramukiza,
tariki ya 03/01/2020 saa cyenda n'igice za mu gitondo (3h30)**

BIKIRA MARIYA : Nyiramukiza mwana wanjye nkunda, ntega amatwi nkubwire ikinzanye muri iri joro .

VALENTINE: Karame Mama ndi hano, ndi igikoresho cyawe ngo untume aho ushaka no ku bo ushaka.

BIKIRA MARIYA : Nje kuguteguza hakiri kare ngo usenge cyane kurushaho kuko ibihe biri imbere bitazoroha na gato, ku bantu bose. Ububabare bwawe bugiye kwiyongera kurushaho kugirango utabare imbaga nyamwinshi y'abantu bagiye kubabara mu buryo butandukanye. Agahinda, intimba , gutotezwa, kwicwa n'inzara, kuguma ahantu hamwe ntacyo bimarira. Imvura, imyuzure, imiyaga n'icyorezo cya kabuhariwe kizavugwa mu mateka y'isi.
Ibyo byose ni byo ugomba gusengera no guhongerera, kuko bizaba bikabije.

Ikindi ni uko nagirango nkubwire ubabarire byimazeyo uriya mwana waguhamagaye agusaba imbabazi ariko cyane cyane anagusaba inkunga y'isengesho. Aho yagize ati :*"Umbabarire ukomeze umujishi ntuzawujishure; ndakwinginze nsengera cyane"*; rero umufashe kuko araremerewe ndabibona.

Agiye kuzahura n'ibigeragezo byinshi byo gutotezwa, kuzahabwa akato, bizamuviramo urupfu rubi maze abantu bazasakuze cyane; mbese bizaba intambara ikomeye cyane mu mitima y'abantu aho bazaba bari hose mu bihugu bitandukanye. Byumwihariko usengere u Rwanda n'abanyarwanda kuko bagiye kuzaba impinduka ku bintu byinshi.

Hazagwa imvura idahita itware amazu asenyuke ku bushake, n'impanuka ziyongere mu bantu n'ibintu, imyuzure itigeze ihaba, inzara, abantu bicane bicwe mbese mwana wa, bigiye kuba bibi kandi ntibizashira vuba.

Usengere rero u Rwanda n'abanyarwanda bose muri rusange, cyane cyane abategetsi ba Leta n'aba Kiriziya kuko bose ntakigenda, barangariye mu by'isi bishira vuba.

Abategetsi bakuru nibamara kubura kubera impamvu zinyuranye nzakubwira ubutaha, nabyo bizatera impagarara mu bantu, bamwe bate umutwe bahemukire inzirakarengane zitagira kirengera. Izindi ziburirwe irengero, kubera urukundo ruke.

Abazaguhamagara kujya gutanga ubuhamya mu mezi ari mbere, uzabime amatwi kuko ntibijyanye n'ubutumwa twagutegetse; ikindi, nta n'icyo byatanga uretse kugushyira mu makosa .

Ntuzajye guca imanza, ahubwo wowe ujye usengera abo bantu bose. Wanyumvise neza mwana wanjye?

VALENTINE: Yego Mama, nakumvise; kandi nabyumvise sinzabikora ahubwo nzabasengera bose. None se Mama ko ibyo mumbwiye byose ko mubizi kandi mukabibona kuki mutabihagarika, ntibibeho ngo abantu bazire ubusa?

Ikindi, Mama urakoze cyane ku nyibutsa kumubabarira mbikuye ku mutima, kuko nari nabyibagiwe ko yampamagaye ansaba imbabazi.

Mama uriya mwana ko mumuzi kundusha kuki mutamuragira, ngo mumurinde ibyo byose?

BIKIRA MARIYA : Ndakomeje, ntega amatwi : Ibiterane bizaba ntuzagire na kimwe ujyamo kuko nzi impamvu mbikubwiye, ariko ntacyo nkubwira nonaha nzakubwira ngarutse. Amakuba nagwira isi uzababara cyane n’ubwo n’ubundi uri kubabara n’ubu ng’ubu, ububabare buzaba butandukanye kure n’ubundi kubera ibyo byose byugarije isi. Umwana azababara, umukuru ababare , abakene n’abakire bababare, bese bazashya ubwoba mbese bizaba bitoroshye na gato kubera ko abantu banze kumva. Nta rukundo na ruke bafitanye bese, bishakira ubukire bw’isi gusa. Fata ishapule yawe uyivuge n’abo muri kumwe bese, kuko niyo izagabanura ubukana bwabyo. Abantu bazifuzaba kuba bonyine, abandi bifuze kuba kumwe n’abandi kandi bidashoboka, bicwe n’ubwoba n’inzara no kwigunga no kwiheba. Bamwe bazabigenderaho, bice inzirakarengane gusa. Mbese ntabwo bitoroha kuko nibyo shitani ishaka ariko humura izatsindwa n’amasengesho y’abana banjye bari impande zose z’isi basenga; nanjye nzaba ndi kumwe namwe mwese bana banjye musenga. Ngibyo ibyo narinje kuguteguza ngo utazatungurwa mwana wanjye, no kugirango usenge kurushaho. Ndihuse mfite akazi kenshi mwana wanjye . Ngaho vuga aya masengesho nguhe umugisha.

“Dawe uri mu ijuru

Izina Ryawe Ryubawe,

Ingoma yawe yogere hose

Icyo ushaka gikorwe muni, nk’uko gikorwa mu ijuru

Ifunguro ridutunga uriduhe none

Utubabarire ibicumuro byacu , nk’uko natwe tubabarira abaducumuyeho

Ntututererane mu bitwoshya, ahubwo udukize icyaha .

“Ndakuramutsa Mariya

Wuzuye inema, Uhorana n’Imana

Wahebuje abyeyi bese umugisha

Na Yezu Umwana wawe, arasingizwa

Mariya Mutagatifu, Mubyeyi w’Imana

Urajye udusabira, turi abanyabyaha

Kuri ubu n’igihe tuzapfira.

“Isengesho ryo gusabira abatwanga:

Mana y’urukundo n’amahoro

Abatwanga bese ubakize ibyaha byabo byose;

Ariko natwe, Uturinde imitego yabo ukomeje

Ku bwa Yezu Kristu Umwami wacu”.

“Hubahwe Imana Data na Mwana, na Roho Mutagatifu
Nk’uko bisanzwe iteka, wubahwe n’ubu n’iteka ryose. Amina.

Nguhaye umugisha wa kibyeyi mwana wanjye,
Ku izina ry’Imana Data na Mwana na Roho Mutagatifu.
Amina.

Wirirwe mwana wanjye.

VALENTINE : Urakoze cyane Mama.

Wirirwe.